

經文：以弗所書 1:15-23

歷代 ê 解經家根據：弗 3:1、4:1、6:20；腓 1:7、13；西 4:3、18；門 10:10、13、22、23 認爲保羅是 tī 該撒利亞 hong 軟禁這二年內，完成了以弗所書、腓立比書、歌羅西書 kap 腓利門書，所以這四封書信又稱做「監獄書信」。Mà 有學者認爲是 tī 羅馬坐監 ê 時寫 ê。不管怎樣，這四封保羅 tī 監獄所寫 ê 書信，卻是書信中 siōng 有 òng 望、siōng 美 ê 書卷。保羅雖然互人關，上帝 phah 開伊心中 ê 目矚，hō 伊看 tiòh 「tī 基督裡 ê 豐盛」，並且將上帝 ê 救贖計畫，有系統地介紹 hō 信徒，書中特別強調合一 ê 重要。以弗所設 tī 小亞細亞 ê 西海岸，是商業中心，亞西亞省 ê 首府。以弗所城有一 ê 亞底米神廟，是古代世界七大奇觀之一，聽講廟內 ê 亞底米女神 kah-ná 是由天頂掉落來 ê，以弗所 ê 人就以女神 ê 看顧者自居（徒 19:35）。保羅第二 pái 旅行佈道經過以弗所，第三 pái 傳道 ê 時 tī chia tòà 三年，是保羅傳道其間 tòà siōng 久 ê 城市。因此 kap 以弗所教會感情特別深，甚至後來經過附近 ê 米利都 ê 時，koh 特別邀請以弗所 ê 長老過來，教示 in 要如何牧養教會（徒 20:18-35）。因爲有一 kóa 重要 ê 聖經抄本並無「hō 以弗所」ê 字句，所以初代教父暗示 chit 張批可能是寫 hō 亞西亞教會 ê 公開批（Col. 西 4:16）。

新譯本簡介舉出第 10 節：「beh tī chiah-ê 日期完滿 ê 時，設法 hō 萬物，不論 tī 天裡 ê tī 地裡 ê，lóng tī 基督來合一」是 chit 張批 ê 鑰句。咱今 á 日所讀 ê 經文 mà 講：基督是教會 ê 頭，beh 統御一切。教會是基督 ê 身軀，tī 基督裡 beh 成作一體。tan 同齊來思考如何建立一個以基督作頭 ê 普世教會。

第 21 節講：「pôaⁿ 過 lóng 總辦正事 ê，掌權 ê，才能 ê，治理 ê，kap 一切所號 ê 名，m-nā tī 今世也 tī 來世，lóng pôaⁿ 過遠遠」tī 這 ê 末世，真 chē 人去相信魔鬼教 kap 其他異端，所謂異端往往有祕密 ê 組織，極權威 ê 領袖，過 kap 社會隔離 ê 宗教生活，甚至出現極端 ê 反社會、反理智 ê 行爲。有 ê 借基督教 ê 名，引用聖經來支持 in ê 教義，誤導群眾。譬如講：人民殿堂(Peoples Temple Christian Church)tī 1978 年 11 月 18 日超過 900 個信徒跟隨教主 James Warren Jones 去南美洲 ê 蓋亞那(Guyana, Soth America) ê 森林內集體自殺，媒體講這是美國史上 siōng 大件 ê 宗教謀殺(或自殺)，人民殿堂 ê 信徒平常過著烏托邦式 ê 集體生活(utopian community)。爲什麼集體自殺是一 ê 謎。我敢斷言講雖然 in 自稱是教會，卻高舉 in ê 教主贏過基督。以弗所書清楚 kā 咱講耶穌 ê 統治超過一切靈界邪惡 ê 權勢；超過一切現世 kap 來世 ê 名號。有一擺咱成人主日學討論到異端，一位兄弟講天主教敢是 mah? 因爲天主教雖然是以使徒信經作信仰告白，卻 kā 馬利亞當作聖母來敬拜，馬利亞是耶穌 ê 母親，總是伊是人，m̄ 是神。當天使 kā 伊講：「聖神 beh 臨到你，至高 ê ê 權能 beh 致蔭你；所以對你生 ê beh 稱做聖，做上帝 ê Kiáⁿ。」(路 1:35)馬利亞真清楚家己 ê 角色 kap 受揀選 ê 恩典，伊應天使講：「我 ê 心尊敬主最大，我 ê 神因爲救我 ê 上帝來歡喜。因爲伊看顧奴婢 ê 卑微。」(1:46-48)偏偏天主教高舉伊作聖母，超越基督 ê 名號，來 kā 伊敬拜。有時咱 mà 會陷入佇 chit 種情景中。耶穌 tī 馬太 6:24 講：「無人會服事兩個主人。… lín bōe-ōe 服事上帝續服事錢財。」所以咱若愛物質贏過愛基督，就是重視其他 ê 東西超越基督 ê 名號。M̄-thang 不慎重。

天主教 ê 神學，對教會 kap 權柄有特殊 ê 解釋，教會對教示聖經 ê 權柄高過聖經 ê 解釋，祭司 ê 權柄 ê thàng 控制教會 ê 聖禮生活。教宗碧岳九世(Pius IX) tī 1854 年 12 月初 8 日公開宣佈聖母無原罪(Immaculate Conception)了後，1870 年 koh-khah 進一步 tī 第一屆梵蒂岡大公會議，裁決教宗無錯誤，教宗對整個教會凡若就信仰 kap 道德問題所作出 ê 宣布，是絕對無錯誤 ê。問題是教宗 mà 是人，一個人按怎有能力 tī 普世教會擔當 hia-ni 重大 ê 角色，tī 上帝面前教宗 kap 咱仝款 lóng 是罪人，lóng 需要上帝 tī 基督耶穌內 ê 赦免。我深信審判 ê 主權 tī 上帝，一旦教宗成做信仰 kap 生活 ê 中心 ê 時，tī 理想 kap 實際執行中間難免會有偏差，等於是 tī 扮演上帝 ê 角色，這 tī 信仰上是真危險 ê。會記得我 tú 上任無 jōa 久，有一擺 kap 一 kóa 兄弟開講，忽然有一位兄弟講：林傳道你離開 ê 時，bē-tàng chhōa 人離開 BTCC。Hit 時有一位姊妹隨接嘴講：bē lah! 林傳道 bē chhōa 人走。我真感謝 chit 兩位兄弟，一位提醒我「基督是教會 ê 頭」，chit ê 姊妹了解我 ê 作人。我應講：設使我 ē-tàng tī BTCC 牧會到退休，退休了後我會去阮 kiáⁿ hia; 若是沒續聘，我見羞死 ah, 哪會 chhōa 人跑？我相信基督是教會 ê 頭，傳教者離開教會了後，基督敢會目調金金 hō 教會停去 mah? 設使傳教者認為 chit 間教會或是機關無我 bē-sái, 除了家己大頭病以外，就是 bō kā 基督當作教會 ê 頭 chiah 會有 chit 種 t'ai-chi 發生。

保羅講：教會是基督 ê 身軀，意思是講凡立志成做基督徒 ê，就是重頭生 ê 人，就是 tī 基督內成作上帝 ê 兒女，是基督身軀 ê 一部分。1978 年台灣基督長老教會召開第 25 屆年會 ê 時，討論向全世界請求支持建立台灣獨立 ê 「人權宣言」是 m̄ 是 beh 列入總會 ê 紀錄，kap 高俊明牧師續任總幹事案。因為不合當時政府 ê 利益，In 想辦法 ài kā 這兩項議案否決掉。年會 ê 頭一工，布農區 ê 牧長互人帶去國民黨「集訓」，國民黨社工組派人來買收五十位議員，ài in 反對這二 ê 議案。有一位議員後來講：我看 tiòh 同工 tē 算錢，親像猶大 tē 算三十兩銀子，心肝真甘苦。Tùi án-ni 暗中通知議長，尙尾堅守佇「人權 kap 鄉土是上帝所賜」 ê 信念。1980 年高俊明牧師是因為藏施明德 ê 罪名 hong in 捉入監。1981 年總會決議無限期聘高俊明牧師擔任總幹事。政府一直壓逼並傳話 hō 長老教會：「設使教會承認高俊明牧師有罪，高牧師馬上 ê thang 離開監獄。」總是總會真清楚表示講：「高牧師所做 ê 是伊 ê 信仰告白，是作基督徒應該有 ê 責任。」當時 ê 長老會 m̄ 驚艱難，為著台灣人 ê 生存 kap 安全出聲，成做見證基督 ê 教會，tī 艱難中教勢漸長，無妥協，只有用堅定 ê 信仰繼續傳揚主耶穌 kap 弱者同受苦 ê 恩典信息。

今 á 日當咱講教會是基督 ê 身軀 ê 時，咱敢有智慧來選擇咱 ê 角色 kap 戰場？咱知影印度國父甘地非常意愛山上寶訓，有一 pái 甘地 tī 南非 beh 進入白人 ê 教會時互 in 拒絕 tī 門外，以後，一生無 koh 踏入教會，總是伊 ê 無抵抗主義卻是對山上寶訓 ê 啓示來 ê。所以咱要時常省察咱是 m̄ 是 kā 人拒絕 tī 恩典 ê 門外？咱要學習通過耶穌 ê 目調看世界；通過耶穌 ê 慈悲心看人。罪犯、妓女、弱勢團體 lóng 是我 ê 兄弟。教會是基督 ê 身軀，雖然教會有種種 ê 缺點 kap 爭端，有時甚至犯了嚴重 ê 罪，總是兩千年來，教會 kā 信耶穌基督 ê 人代代傳落來；大聲呼召勞苦擔重擔 ê 人來安歇 tī 主耶穌 ê 懷抱，受洗，成做基督徒。Ng 望上帝 phah 開咱心中 ê 目調，hō 咱看 tiòh 今 á 日咱在地上所做 siōng 平凡 ê 事，譬如講：探訪病人，安慰厝邊、幫助弱小、服事教會等等 lóng 是有永遠 ê 意義，lóng 是同款分享 tī 基督內面無比豐盛 ê 恩典。